

Kerweredd 2019

Von Moritz Strasser
& Leonie Kennel

Einleitung

Ich griß eich all, ihr lieue Leit,
E Johr is rum, es is soweit,
mer han werre unser schenschdi Kerwezeit!

Es Wetter is schää, die Sunn brennt,
es is so schää, dass es net schöner sin kännt.

Es is e ganzes Johr schun vorbei,
manche wurde Eltre un hann schon ihr Kinnerscher debei.

Am Freitag hammer die Kerb do jowwe uf de Fels werre zum Lewe
erweckt,
mer hann gesung, geplärrt, Bier getrunk un was uns sonschd noch alles
schmeckt.

Das ganze geht noch bis Monda owend so weiter
Bis mer werre die kerb beerdische misse, leider!

Doch nun du ich erschd mol was verzehle
Was do so abgeht im Nerremohrer Lebe!

Vorher muss ich awer saan, so kanns net bleibe
Aweil muss ich mir mo mei Schwäs abreiwe.

Drum spielt die Musik jetzt zum erste Moh
dodezu isse jo a schließlich do!

1. Akt

Ich han lang iwwerleet, was ich als erstes bericht
Dann hann ich gedenkt, nemm ich doch efach die do Geschicht.

Mir erinnere uns jo all noch an die Nacht,
an ders jo nimmi zu krache ufgeheert hat.

Am Anfang hat sich nimand was kenne denke,
dass es Wetter sich noch wird umschwenke.

Wo de Himmel früh owends noch relativ klar,
ware später schon ganz schääviel Wolke da.

Un als die Sunn weg war, gings erschd rischtisch los,
do war de Balawer vor de Deere dan richtisch groß.

Un wies abzusiehe war, es hat gedauert net lang,
e kurzi Zeit später is de Piepser schon gang!

Raus aus de Kiste, rinn in die Schlappe
un jetzert schnell zum Auto tappe.

Geränt hats net lang, dochs war schon so krass,
kaum draus, warn mir schon beide Knöchel nass.

Un als mer weg ware, in Nerremohr raus
Hammer gehall fast an jedem Haus!

Während desse hammer vergess, e Gedanke an unser Eigenheim zu
schenke,
Gott sei Dank, helft jo trotzdem enni mitdenke.

In de Keller isse runner, angemach es Licht,
hat sich do schon e eigener Pool ingerischt.

Ach Gott, was mach ischn jetzt!
Kenner do, die 2 sinn jo in de Insatz gehetzt!

Die Trepp werre nuff, ausm Fenster die Feierwehr gesiehn,
die war aber leider nimmi se kriehn.

Im Nachbarhof der Familie Lang,
sin nämlich Nerremohrer Niagara-Fäll entstann.

So Schlimm wars dann doch net, für e Person allerdings genuch
Drum hat se die Tochter und Tante geruf.

Zusamme han se sich e paar Emer genumm
un es Wasser werre ausm Keller gebrung.

Die Musik dut jetzt ihr Inschdrumente quäle,
Hoffentlich misse ner net nochemo Feierwehr spiele.

Musik

Straußbuwe

2. Akt

Net nur die Geschicht hat uns zum Nodenke gebrung,
schlechtes Wetter hotte mer ach letschd Johr beim Zelte schun.

Un es is net zu leugne, es kriecht jeder mit
Richtisch kalt wars im Winter die letschde Johr net.

De Klimawandel, der schreitet vor,
deshalb is unser Motto in diesem Johr:

Damit mer ach näscht Johr noch an kaltem Bier han unser Spaß.
Trenne mers Bier konsequent vom Glas.

Straußbuwe (noch was fers Motto)

3. Akt

E klääni Roll spielt's Wasser im nächste Akt aa,
wo is viel Wasser? Im Schwimmbad, ganz klar!

Ob jung, ob alt, Besucher gebts viel,
doch net nur zur Freude geht mer dort hin.

Unner uns hammer enni, die wo dort schafft
Net als Bademeisterin, ne, als Putzkraft.

Wische mitm lumpe üwer die Fliese ganz fix
Passiert is dodebei bisher noch nix.

So Hats gebutzt wie immer die tägliche Bahn
Schwupps, war do uf emol e Poschde an de Nas dran.

Es war net grad harmlos, es blut is geloff,
Do hat sichs tatsächlich debei die Nas gebroch.

Doch mach der nix draus, bassiere duts viele,
was mer net sieht, das dut mer halt spüre.

Die Musik spielt jetzt laut un schää
fers Scherne Gabi ganz allä!

Musik
Straußbuwe

4. Akt

Viele werns kenne, vor allem die Fraue
Sei krempel dud mehr heitzudas nur noch in de Arschdasch verstaue.

Denne Trend siehn ich oft, ich makes mit!
Ob das so es wahre is, wees ich jetzt net.

Eigentlich is das jo üwerhapt net schlimm
Kritisch werds erschd wenn ma uff de klo gehe will.

Dodevon hat ach enni ausm Ort Erfahrung mache misse
Diese Person werds jetzt ah besser wisse.

Beim Gang uf de Klo war se wohl in Gedanke,
heit würd se sich üwwer e bissje mehr Achtsamkeit bedanke.

Schnell uf de Top, laafe geloss,
abgebutzt un werre hochgezoh die Hoss.

Schon wars bassiert, drin leit das Gerät.
Gemerkt hat ses schon, do wars awwer se spät.

De Spüler betätischt, es Wasser is gefloss,
es Handy wahrscheinlich schon in de Abfluss geschoß.

Liewi Frau Schuck, ich geb dir e Tipp:
Handys in de Vorderdasch sin a werre hip.

Mir singe jetzt noch e Ständche fer dich
un dodruf dass de werre erreichbar bischd.

Musik
Straußbuwe

5. Akt

Wie in de letschde Johre ah
Hat mer viel zu erzähle von dem ähne Da.

Ich redd vom Vadderda, ihr hans geahnt
un vor allem die Reischbach is fer denne Da bekannt.

Un wie mer das schon immer so mache,
mir ware aa dort, ihr wern lache!

Dort hat mer getrunck, gedantz un gelacht,
doch a de schänschte Da is mol vorbei und ma hat sich uf de Weg gemacht.

Moins ware mehr noch viel kläne Gruppe
Doch Heimwärts gings als e große Truppe.

Mit Kind und Kegel hammer uns gequält de Bersch enuff
Unnerwegs hotte mer dann Probläme mit manchem wo hat gut gesoff.

So hätt mers sich schon kenne im Voraus denke,
es bliebe e paar halt unnerwegs henke.

Am Aussichtspunkt ankomm ware mer noch komplett,
weiterlaafe wollt do so mancher awer net.

Geraschd hammer kurz, ball simmer weiter,
Leie blibb is do awer enner – leider!

Gemerkt hammers net, sin fort geloff,
hätt der arm Buh mo net so viel gesoff!

Doch edel wars net, es is efach wohr,
sorry Stefan, das kommt nimmi vor!

Straußbuwe (Stefan)

Doch das war net alles, bassiert is noch mäh,
Schließlich ware mer jo noch net dehäm!

Enner von dem mers als öfter hert,
dem hats Gestrübb de Hämwesch erschwert.

Der hat sich gedenkt, ich muss mo pausiere
ich kännts mo zum leie in de Hecke probiere.

Gott sei Dank wurd der noch gefunn
Un sicher von uns häm gebrung.

Falls ner eich denke, von wem redd der dann do;
ich red von kemm annere als vom Viertel Ingo!

Soweit, so gut, mir Richtung Nerremohr gang,
doch der Weg, der war noch ganz schää lang!

Em hats gelangt, der wollt schneller gehe,
der hat gemennt, er misst e Zahn zulehe.

Doch wider Erwarten, es zieht enner mit,
intressiert hat das die Leit eher net!

Der dann schnell häm, de Weg is geschafft
Es langt jo a grad, schnell rin un Gut Nacht!

So efach wars dann awer doch net geween,
das wär jo aa grad viel se schään!

Vor de Deer gestann, jetzt nur noch nei,
.....“Scheiße, ich han jo gar kää Schlüssel debei!“

Kenner is do, all sin se noch am laafe,
hock ich mich halt hin un warte!

Un leider hat ne es Glück komplett verloss,
als er ufstehe wollt, isser erstmol gege de Bode geschoss!

Schlimm wars net, dem Kerl geht's gut,
er hat halt nur e bissje geblut.
Un Gott sei Dank isses Miriam komm,
mit der hatter dann ah rin gefunn.

Dehäm ware all am näschte Da,
hans sich gut erholt un frähn sich schon uffs näschte Jahr.

Die Musik spielt jetzt mit Trara,
uf dene schöne Vadderda!

Musik

Straußbuwe

6. Akt

Mit de Bahn hat so mancher ab un zu sei Probläme
Un oft denkt ma, dass die Unpünktlichkeit am Wetter läge.

Worans alsemol werklich leit, es is kaum zu glaabe,
eh Variante werr ich eich jetzt verrate!

Im Winter hat mo werre die Wanderslust eingesetzt
Do is die Feierwehr mo no Matzebach gehetzt.

Dort hammer gutt gess und viel getrunk
Aber irgendwann hat uns doch de Häämweg zugewunk.

Die äne sin noch gelof, die annere han de Zug genommm,
doch der is naderlich werre net pünktlich komm.

Als er mit Verspätung irgendwann erschien,
sind mer also widder no Nerremohr hin.

Mer han uns nix weiter dodebei gedenkt,
als mer von dem Zug wurde hem gelenkt.

Doch späternaus am Niedermohrer Bahnhof,
dort war dann die Uffrechung ziemlich groß.

an dere Verspätung war Net s' Wetter Schuld ,
verantwortlich ware e paar Borsch ohne Geduld.

No nem Ausfluch, wo viel getrunck wor is
Hat mer de Blick uf die Uhr mol eher vergess.

Zusamme sin se nochzum Zug gerennt,
Dodebei han se sich allerdings getrennt.

E paar han im Zug schon gesess,
Un han die annere unnerwegs vergess.

So kame die letschde ganz kerz vor de Abreise,
Und wählte de Weg schnell üwwer die Gleise.

De Fahrer vom Zug is schää ausgetickt
Un hat die Buwe ausm Zug raus geschickt.

Doch bis die das mol han verstann
is e ganz schää langi Zeit vergang!

Die Borsch mussten sich e annerer Transport fer häm suche.
Un so mancher dud üwwer die Aktion heit noch fluche.

Marc un Ingo, fer eich singe mer heit,
gucken doch s nächste mol uf die Uhr zu ner frühere Zeit!

Straußbuwe

Hanna

Falls ner eich denke, komm mo zum Schluss, es langt jetzt doch;
E letschdes Anliege hätt ich do noch

Un zwar hann mer unner uns e Gebortsdaskind
Hanna, fer dich singe mer mol noch e liedsche geschwind
Mer muss dezu noch sahn es is ke langweilische Zahl
Dei gebortsa jährt sich heit zum 18te Mal

Drum hoff ich das de heit dei Da genieschd
Un viele tolle Geschenke krieschd

Doch net, dass mir versage beim Singe
misse jetzt ach eier Stimme erklinge!

De Hendrik stimmt jetzt es Liedsche an
Hängen eich efach an dem sei Stimm dran

Lied (zum Geburtstag viel Glück)
Straußbuwe

Schluss

Bevor ich zum Schluss komm will ich mich ohne Schranke
Fer die Unterstützung vom Arbeiterverein, de Musiker und alle annere die
uns geholf han bedanke!

Ehr Leit drum dun jetzt all die Hänn aus de Säck eraus
Un gewwe denne Leit ehr verdierter Applaus!

Un so mancher der do jowwe sei Name konnt here,
der werd sich do driwwer doch hoffentlich net steere.

Denne kann ich nämlich saan
nächst Johr sin werre annere dran!

Ich men allemohl, es langt fer das Johr,
mir han heit jo ah noch was anneres vor.

Glei du mer erschemol die drei erschde tippele
Hoffentlich dun sich dodebei net unser fieß verknibbele.

Drin in de Wertschaft is gut vorgesorscht,
s gebt Bier, Wein, Kneedel un Worschd!

Awwer bevor mer dezu komme, das zu genieße
Will ich noch unser schöner Kerwestrauß begieße.

„DU SOLLSCHT ES GANZE JOHR ÜWWER HENKE,
DASS MER NOCH LANG AN UNSER KERB SERICK DENKE!“

Straußbuwe

So das wars, mei Redd is vorbei,
ich komm jetzt runner, mir siehn uns jo glei!

Es Wort geb ich noch de Instrumente,
ihr finne doch aa, dass die nommo spiele konnte!